

Caribbean Queen ta Presenta Artista Belinda De Veer



ORANJESTAD – E tienda di Caribbean Queen, situa na Palm Beach Plaza Mall, ta honrando un artista femenino local, kende ta biba y crea riba e isla, tur luna. E programa di Reina Caribense a wordo lansa for di e tempo cu e tienda a habri na fin di 2011. Pa e luna di Maart 2013, artista local Belinda De Veer ta e Reina Caribense, prominentemente exponiendo su joyas bunita y atrevido di koper den e tienda. Belinda ta un artista plastico bon estableci riba e isla. El a nace na Aruba, pero el a studia na Merca pa shete aña, unda el a obtene un doctoral den farmacologia. Na e momento di su regreso pa e isla, su interes den arte visual y musica a yega su punto mas halto, y el a sigui varios tayer na Ateliers '89. E tayernan a wordo duna pa maestro-nan famoso for di e Rietveld

Academie na Amsterdam, y no a tuma hopi tempo prome cu el a transforma su cas den un atelier y studio di musica, cu suficiente espacio pa su piano stima, cual e ta tocando desde e edad di 9 aña. Na october di 2012, Belinda a presenta un solo exhibicion titula "Paraiso den Desierto", cual a wordo habri oficialmente pa e Minister di Asunto Economico, Asunto Social y Cultura, su Excelencia Michelle Hoooyboer Winkelaar. Un di e piesanan exponi tabata un escultura traha di kabelnan di koper for di e defunto refinaria di Valero. E kabelnan di koper tabata entre e varios materialnan recicla cu Belinda a obtene for di e sitio bandona. E escultura, titula "Hardin Encanta", a ricibi su nomber danki na e briyo magico di e koper cora di calidad halto ora cu

esaki a wordo ilumina pa e luz di solo. Belinda tambe a faborece e oxidacion berde di koper y e imagen fragil cu e ta proyecta apesar di su durabilidad y forsa. Na honor di su solo exhibicion, Belinda tambe a crea un coleccion di piesanan di joyas creativo y unico di koper pa asina semper recorda e persona cu ta bisti e joyas y colector di arte riba e importancia di cambio y sostenibilidad, cual ta es-

encial pa e mundo manera nos conoce. Belinda su joyas di koper ta cuidadosamente traha y acaba cu wax.

Despues di cada uzo, bo ta ser pidi encarecidamente pa laba bo joyas cu awa pa asina kita azeta y salonnan di curpa, e despues seca bo piesa unico cu un serbete. Si e joyas ta bira dof of ta oxida, instruccionnan pa limpiesa y pone un capa nobo ta obtenibel na

e tienda. Mientras cu e creacion di joyas di koper awo ta e tipo di obra preferi di Belinda, e ta trahando tambe riba su musica, studiando cu e pianista Arubiano ganado di premio, Armand Simon. Disfruta di Belinda su joyas durante henter e luna di maart na Caribbean Queen, Palm Beach Plaza Mall. Riba e fotonan por tira un bista di e obranan crea door di e artista Belinda de Veer. □